

**U ovom broju, između ostalog, čitajte:**

- **Održana Skupština Udruženja poslodavaca u FBiH**
- **Predstavnici Udruženja poslodavaca KS i članovi Vlade KS o unapređenju poslovnog ambijenta**
- **UPFBiH zahtijeva održavanje hitne zajedničke sjednice Parlamenta FBiH o alarmantnom stanju na tržištu radne snage**
- **Održan sastanak u vezi liberalizacije uvoza radne snage**
- **Predstavnici UPFBiH i Grupacije poslodavaca ZDK pri UPFBiH održali sastanak sa premijerkom ZDK i ministrom za privredu ZDK**
- **Sastanak u vezi Zakona o unutrašnjoj trgovini**
- **Direktor UPFBiH prisustvovao sastanku Radne grupe za pripremu Zakona o posredovanju u zapošljavanju**







## Održana Skupština Udruženja poslodavaca u FBiH

**Razmatrani Izvještaj o radu UPFBiH, Izvještaj o radu Ekonomsko-socijalnom vijeću za teritoriju FBiH, kao i finansijski izvještaj za proteklu godinu i finansijski plan za tekuću godinu**

U Zenici je 25. aprila 2023. godine, pod predsjedavanjem Borisa Kamšigovskog, održana 20. redovna godišnja Skupština Udruženja poslodavaca u FBiH na kojoj su razmatrani Izvještaj o radu UPFBiH, Izvještaj o radu Ekonomsko-socijalnom vijeću za teritoriju FBiH, kao i finansijski izvještaj za proteklu godinu i finansijski plan za tekuću godinu koje su prisutnim delegatima prezentirali predsjednik Upravnog odbora UPFBiH Adnan Smailbegović i direktor UPFBiH Mario Nenadić.



Skupštini su prisustvovali najviši zvaničnici izvršne i zakonodavne vlasti svih nivoa, predstavnici sindikata i partnerskih organizacija Udruženja, od predsjednice Federacije BiH Lidije Bradare i potpredsjednika Refika Lende, potpredsjednici oba Doma Parlamenta FBiH, premijera Vlade

FBiH Fadila Novalića, do ministara u aktuелnoj Vladi Veska Drljače, Amira Zukića i Zlatana Vujanovića, predstavnika Sindikata Samira Kurtovića, predsjednika ESV-a FBiH Edhema Bibera, kao i drugih predstavnika vlasti, nevladinih organizacija i privrednika.

Predsjednik Skupštine Boris Kamšigovski je otvarajući sjednicu istakao zadovoljstvo činjenicom da je Udruženje poslodavaca u FBiH jedno od rijetkih nevladinih organizacija koje na svojoj redovnoj sjednici okuplja najviše predstavnike izvršne i zakonodavne vlasti, sindikata i poslodavaca.



Govoreći o radu Udruženja u prethodnoj godini, predsjednik Adnan Smailbegović je apostrofirao nekoliko značajnih rezultata koje je Udruženje realiziralo.

"Radili smo puno na nekoliko smjerova, no, izdvojio bih najvažnije: potpisano je sedam



kolektivnih ugovore koji su odnose na dvije trećine radnika u realnom sektoru, pripremljen je Zakon o zdravstvenom osiguranju, usaglašeno je pitanje cijene električne energije, usaglasili smo procedure za olakšan izvoz, uputili smo u proceduru Zakon o porezu na dohodak i Zakon o doprinosima za koje očekujemo da već na idućoj sjednici budu na dnevnom redu Parlamenta Federacije

BiH" kazao je Smailbegović delegatima.

Podsjetio je i na ozbiljan rad Udruženja na dokumentu "Šta poslodavci očekuju od vlasti" koji su poslodavci u izravnim susretima predstavili političkim partijama u FBiH.

Smailbegović je zahvalio prisutnim gostima iz sindikata na ostvarenom višem





nivou saradnje, naglasivši da su i poslodavci i sindikati shvatili da imaju puno zajedničkih interesa, te da ih samo zajednički rad sa vlastima kroz socijalni dijalog može dovesti do cilja.

"Stvorila se jedna dobra sinergija koja je potrebna za kvalitetnu promjenu i tako smo na Ekonomsko-socijalnom vijeću došli do granskih ugovora, minimalne plaće, usaglašenog zakona o doprinosima i dohotku. Brojčano smo jači za 25 novih članica, koje su prepoznale značaj i snagu Udruženja, a cilj nam je u ovoj godini raditi na liberalizaciji tržišta rada, što će doprinijeti poboljšanju položaja radnika u FBiH i liberalizaciji uvoza radne snage tamo gdje je to potrebno" rekao je Smailbegović čiji su izvještaj o radu i plan za tekuću godinu delegati jednoglasno usvojili.



Direktor Udruženja Mario Nenadić je prezentirao finansijski izvještaj UPFBiH za 2022. godinu i finansijski plan za 2023. godinu koje su delegati i usvojili u predloženom obliku. Finansijski pokazatelji za ovu godinu bi, prema riječima Nenadića, trebali biti unaprijeđeni s obzirom na porast broja članica, kao i projekte koje u saradnji sa različitim domaćim i međunarodnim

organizacijama realizira Udruženje poslodavaca.

Skupština je na prijedlog Upravnog odbora, razriješila dužnosti dosadašnjeg člana UO UPFBiH Predraga Čovića zbog njegovog imenovanja za premijera Zapadnohercegovačkog kantona i imenovala novog člana Tomislava Vrdoljaka, direktora Livno-putova.

U sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj






BiH – EISE projekat" koji provodi UPFBiH i Unija poslodavaca RS, a koji finansira Europska unija održan je i tematski dio sjednice na kojem su prisutni raspravljali na temu direktnih i indirektnih poreza, odnosno razmijenili stavove vezano za već poznate probleme u praksi koji se odnose na fiskalne zakone kojima se definišu direktni i indirektni porezi.

Skupština se održala u duhu poslovne saradnje, povjerenja među partnerima iz vlasti, poslodavaca i sindikata uz jasne poruke poslodavaca da su potrebni dodatni zajednički naponi na poboljšanju poslovnog okruženja, izmjenama propisa, smanjenju opterećenja poslodavaca u pogledu fiskalnih i parafiskalnih nameta, osiguranju uslova za razvoj, a time i zadržavanje radne snage u BiH i poboljšanju uslova za njihov rad.

## Održana sjednica UO UPFBiH



Redovna, peta, sjednica Upravnog odbora Udruženja poslodavaca u FBiH održana je 19. aprila 2023. godine na kojoj su razmatrani materijali za predstojeću Skupštinu UPFBiH koja će se održati 25.04.2023. godine u Zenici.

Članovi UO usvojili su Prijedlog izvještaja o radu UPFBiH za 2022. godinu, Prijedlog Finansijskog izvještaja UPFBiH za 2022. godinu, Prijedlog Izvještaja o radu ESV- a za teritoriju FBiH 2022. godinu, Prijedlog Plana rada UPFBiH za 2023. godinu te Prijedlog Finansijskog plana UP FBiH za 2023. godinu.

Članovi su također usvojili prijedlog Odluke o razrješenju člana Upravnog odbora i imenovanju novog člana Upravnog odbora UPFBiH.

Pomenuti prijedlozi bit će dati na usvajanje na predstojećoj Skupštini UPFBiH.

## Predstavnici Udruženja poslodavaca KS i članovi Vlade KS o unapređenju poslovnog ambijenta

**Poslodavci susret iskoristili kako bi članovima Vlade ukazali na probleme s kojima se susreću, kao i očekivanja od novog saziva Vlade**



Udruženje poslodavaca Kantona Sarajevo održalo je 26. aprila 2023. godine tematsku sjednicu Upravnog odbora posvećenu prioritetnim aktivnostima vezanim za privredu u Kantonu Sarajevo.

Izuzev članova Upravnog odbora, sjednici su prisustvovali i direktor Udruženja poslodavaca FBiH Mario Nenadić, premijer Vlade KS Nihad Uk te ministri Zlatko Mijatović, Emir Dedović, Almir Bečarević, Enda Pavić Pečenković, Naida Hota-Muminović, Admir Katica i Omer Osmanović, kao i v.d. direktorica Zavoda za zapošljavanje KS Edina Ljubuškić.



Predsjednik UO Udruženja poslodavaca KS Suad Ećo objasnio je da su poslodavci današnji



susret iskoristili kako bi članovima Vlade ukazali na probleme s kojima se susreću, kao i očekivanja od novog saziva Vlade.



"Vlada KS bi ubrzanim koracima kvalitetnim zakonskim rješenjima trebala riješiti aktuelne probleme, prije svega, nedostatak kvalitetne radne snage. S jedne strane imamo 60.000 osoba na biroima, a s druge strane poslodavcima je potreban veliki broj radnika. U takvim okolnostima, pored tolikog broja nezaposlenih, mislim da nije opravdano govoriti o uvozu radne

snage", istakao je Ećo.

Naveo je i očekivanje da će, kako je i obećao premijer Uk, Vlada što prije razmotriti zakon o ekonomsko-socijalnom vijeću.

"Mi smo tu treći partner Vlade i kroz zakon tu ulogu želimo definirati, da znamo prava i obaveze", naveo je Ećo.



Naveo je da poslodavci očekuju brze odluke i kada su u pitanju drugi problemi s kojima se susreću, poput plaćanja određenih članarina, poput turističke, i cijene odvoza smeća, kako bi usluga koja im je potrebna iz javnog sektora bila što efikasnija. Potcrtao je i da se definitivno mora raditi i na digitalizaciji procesa, bržem izdavanju građevinskih dozvola, poboljšanju ambijenta za investiranje itd. Pomenuo je i dugoročna rješenja, poput zakona o obrazovanju, odnosno dualnom obrazovanju.

"To su zakoni koji bi doprinijeli većem zapošljavanju u Kantonu Sarajevo, većim plaćama i što je krajnji cilj, zadržavanju građana u Kantonu Sarajevo i Bosni i Hercegovini", zaključio je Ećo.

Premijer Uk izrazio je zadovoljstvo da je otvoren dijalog između Vlade i poslodavaca te je istakao da s privrednicima moraju biti uspostavljeni najbolji mogući odnosi, s obzirom na to da oni finansiraju ekonomiju Kantona Sarajevo.

"Danas razgovaramo o dualnom obrazovanju, reformi Zavoda za zapošljavanje, odnosno



reformi usluga koje Zavod pruža poslodavcima, te komunalnim, odnosno taksama za odvoz smeća. Nadam se da će ovaj način komunikacije između Vlade i Udruženja poslodavaca biti konstanta, gdje ćemo na mjesečnoj bazi ""čekirati"" ono što dogovorimo", izjavio je Uk.

Obećao je da će poslodavci biti konsultovani za sve propise koji ih se tiču, kako Vlada ne bi donosila akte koji nisu provodivi na tržištu rada. U tom pogledu, kako je rekao, u narednom periodu bit će puno posla.

Upitan koji su prvi konkretni koraci Vlade KS u tom pogledu, premijer Uk je odgovorio da će zakon o ekonomsko-socijalnom vijeću u narednom periodu biti razmatran na sjednici Vlade. Izrazio je nadu da se čim prije zakonski riješiti i posredovanje u zapošljavanju, a što zavisi i od federalnog nivoa vlasti.



## UPFBiH zahtijeva održavanje hitne zajedničke sjednice Parlamenta FBiH o alarmantnom stanju na tržištu radne snage



Udruženje poslodavaca u Federaciji Bosne i Hercegovine ponovno upozorava institucije izvršne i zakonodavne vlasti na svim nivoima u BiH, posebno u FBiH, na alarmantnu situaciju na tržištu radne snage, sve snažniji trend odlazaka kvalificiranih radnika i kompletnih porodica iz BiH te složenih i dugotrajnih administrativnih procedura vezanih za uvoz nedostajuće radne snage.

"Svakodnevno iz kompanija, članica Udruženja, dobijamo informacije o odlasku kvalificiranih radnika što u konačnici dovodi do usporavanja ili potpunog kolapsa radnih procesa. Na realan problem koji imamo sa tržištem radne snage upozoravamo godinama, ali niko u vlasti, ni na jednom nivou ne radi ništa na zaustavljanju odlaska radnika ili pojednostavljenju procedura kada je u pitanju uvoz radne snage. Nažalost, jedino konkretno što su vlasti uradile za zaposlene jeste povećanje plaća – sebi i zaposlenima u javnoj službi. Neće, ne žele i ne shvataju da ukoliko se nastavi trend odlazaka kvalifikovane radne snage iz BiH, više neće biti onih koji će im zaraditi te, uvećane, plaće", ističu iz UPFBiH.

Podsjećaju da je UPFBiH zajedno sa sindikatima iz realnog sektora krajem prošle godine iniciralo hitno donošenje zakona o izmjenama i dopunama Zakona o doprinosima FBiH i Zakona o porezu na dohodak FBiH, čime bi se zaposlenima u realnom sektoru plaće povećale do 400 KM, a na uvećani iznos bi se plaćali umanjeni doprinosi na PIO/MIO i zdravstveno osiguranje. Totalno odsustvo sluha za probleme građana pokazali su zastupnici i delegati u

Parlamentu FBiH koji puna tri mjeseca ove prijedloge nisu stavili na dnevni red, čime direktno pomažu odlazak radne snage iz BiH. Podaci o izdatim radnim dozvolama bh. državljanima u inostranstvu, govore da je process iseljavanja nastavljen i ubrzan. O tome niko osim poslodavaca trenutno ne razgovara, niti se poduzimaju aktivnosti na tom planu. I dalje se nije uradilo ništa ni na omogućavanju privremenog i povremenog zapošljavanja studenata i učenika, što je praksa svugdje u okruženju i šire.

"Zbog svega navedenog i do uspostave funkcionalne izvršne vlasti u FBiH, UPFBiH zahtijeva održavanje hitne tematske sjednice oba doma Parlamenta FBiH o pitanju odlaska radne snage iz BiH, kao i problema sa uvozom nedostajuće radne snage iz inozemstva. Kao i u slučaju pripreme konkretnih propisa i ponuđenih rješenja, poslodavci su, ako to već vlasti ne žele, spremni ponuditi i materijale za ovu hitnu sjednicu, obrazložiti iste i predložiti konkretna rješenja za spomenute probleme", naglašavaju iz UPFBiH.

## Održan sastanak u vezi liberalizacije uvoza radne snage

**Zaključeno je da će UPFBiH dostaviti prijedloge određenih rješenja nadležnim tijelima**



U prostorijama UPFBiH 13. aprila 2023. godine održan je sastanak u vezi liberalizacije uvoza radne snage na kojem su učestvovali predstavnici Ministarstva vanjskih poslova BiH, Ministarstva civilnih poslova, Ministarstva rada i socijalne politike FBiH, Agencije za rad i zapošljavanje BiH, Federalnog zavoda za zapošljavanje te Službe za poslove sa strancima.



U uvodnom obraćanju predstavnici UPFBiH ponovili su probleme u vezi sa nedostatkom radne snage u FBiH te kao jedno od rješenja iskazali potrebu za liberalizacijom uvoza radne snage. Istakli su da su propisi arhaični, neprilagođeni trenutnim potrebama, procedure previše složene, nadležnosti usložnjene između tri do četiri nivoa vlasti u BiH te da je sistem izuzetno komplikovan. Naglasi su također da su evidencije službi za zapošljavanje su za ove namjene gotovo neupotrebljive.



Uvoz radne snage predugo se čeka, a procedure su dugotrajne i nepovezane bez obzira da li se radi o podnošenju aplikacija, provedbi sigurnosnih provjera, dozvola u resornim ministarstvima, službama za zapošljavanje i na kraju pitanja izdavanja D viza iz nadležnosti Ministarstva vanjskih poslova.

Sve što su poslodavci locirali kao problem je potvrđeno na sastanku te su učesnici pokušali izabrati najpraktičnija rješenja bez obzira da li se radi o izmjeni zakona, podzakonskih akata ili operativnih postupanja nadležnih institucija.

Zaključeno je da će UPFBiH dostaviti prijedloge određenih rješenja nadležnom federalnom ministarstvu, zavodu za zapošljavanje ali i državnim ministarstvima i Agenciji za rad i zapošljavanje BiH čime bi se inicirale urgentne promjene po predmetnom pitanju.

Prema analiziranom stanju, najveći broj aktivnosti očekuje se od Ministarstva za rad i socijalnu politiku kao i saradnja tog ministarstva sa Federalnim zavodom za zapošljavanja i kantonalnim službama sa zapošljavanje.

## **Predstavници UPFBiH i Grupacije poslodavaca ZDK pri UPFBiH održali sastanak sa premijerkom ZDK i ministrom za privredu ZDK**

**Poslodavci naveli da je jedna od važnih aktivnosti UPFBiH priprema prijedloga novih zakonskih rješenja i propisa kojima se popravljaju poslovno okruženje i unaprjeđuju uslovi za razvoj privrede**



Predstavnici Udruženja poslodavaca u Federaciji Bosne i Hercegovine, predsjednik i direktor Adnan Smalbegović i Mario Nenadić te predsjednica Upravnog odbora Grupacije poslodavaca Zeničko-dobojskog kantona pri UPFBiH Alma Zaimović i potpredsjednici Grupacije poslodavaca ZDK pri UPFBiH Ibrahim Meškić i Nagib Mujkić održali su 12. aprila sastanak sa premijerkom Zeničko-dobojskog kantona Amrom Mehmedić i ministrom za privredu ZDK Samir Šibonjić

Predstavnici UPFBiH upoznali su premijerku i ministra s radom i aktivnostima Udruženja poslodavaca u FBiH i Grupacije poslodavaca ZDK pri UPFBiH, kao i radom delegacije poslodavaca u Ekonomsko-socijalnom vijeću ZDK.

Naveli su da je jedna od važnih aktivnosti ovog udruženja priprema prijedloga novih zakonskih rješenja i propisa kojima se popravljaju poslovno okruženje i unaprjeđuju uslovi za razvoj privrede i ekonomske reforme, te da se kroz ovu i druge aktivnosti otvara prostor za saradnju



s vlastima.

Od aktivnosti po kantonima na kojima bi se u narednom periodu trebalo aktivno raditi, pa tako i u Zeničko-dobojskom kantonu, naveli su donošenje Zakona o ekonomsko-socijalnom vijeću, Zakona o dualnom obrazovanju, ukidanje i smanjenje parafiskalnih nameta te rješavanje problema nedostatka kvalifikovane radne snage kroz prilagođavanje nastavnih kurikuluma, prekvalifikacije i dokvalifikacije.

Premijerka Mehmedić je istakla da poslodavci imaju partnera u Vladi Zeničko-dobojskog kantona te da postoji spremnost Vlade da zajedno rade na poboljšanju ukupnog poslovnog ambijenta. Također je sa velikim razumijevanjem prihvatila zahtjev predstavnika UPFBiH o unapređenju ekonomsko-socijalnog dijaloga kroz rad ESV-a i na druge načine saradnje poslodavaca, vlasti i sindikata.



Ministar privrede Šibonjić rekao je da je intencija ovog ministarstva da pruži još snažniju podršku jačanju konkurentnosti privrede ZDK-a, koja je jedan od pokretača ekonomije FBiH, navodeći da je ovogodišnji program podsticaja za privredu skoro udvostručen, tako što je povećan sa 4,5 miliona na 8,3 miliona KM.

Od toga, za subvencije privatnim preduzećima i poduzetnicima predviđeno je 4,6 miliona KM, a preostalih 3,7 miliona KM za razvoj infrastrukture poslovnih zona, što je najveće izdvajanje do sada.

## Sastanak u vezi Zakona o unutrašnjoj trgovini

### Predloženi Nacrt još uvijek sadrži dosta neriješenih i nedorečenih pitanja



Nakon što je Vlada FBiH utvrdila Nacrt zakona o unutrašnjoj trgovini i isti uputila u parlamentarnu proceduru, Udruženje poslodavaca u FBiH, s ciljem blagovremene pripreme za sudjelovanje u daljnjim aktivnostima, održalo je sastanak na kojem su prisustvovali predstavnici Konzum/Mercatora, dm drogerie markt, GS1, E-Commerce Asocijacije, Binga i Penny Plus.

Radna grupa je utvrdila da predloženi Nacrt još uvijek sadrži dosta neriješenih i nedorečenih pitanja i s ciljem kvalitetnijeg uređenje unutrašnje trgovine u FBiH, UPFBiH će pripremiti amandmane u skladu sa utvrđenim stavovima radne grupe.

Na sastanku su utvrđeni neophodne korekcije i prijedlozi za dopunu zakona što će biti polazna osnova i stav UPFBiH nakon što se zakon nađe pred zastupnicima u Parlamentu.



## Direktor UPFBiH prisustvovao sastanku Radne grupe za pripremu Zakona o posredovanju u zapošljavanju

**Sva rješenja koja je UPFBiH ranije pripremilo prihvaćena su u tekstu koji se priprema**



Direktor UPFBiH Mario Nenadić prisustvovao je 06. aprila 2023. godine sastanku Radne grupe za pripremu Zakona o posredovanju u zapošljavanju. Rad na pripremi ovog zakona je na zahtjev predstavnika UPFBiH ubrzan. Sva rješenja koja je UPFBiH ranije pripremilo prihvaćena su u tekstu koji se priprema i u narednih 15 dana očekuje se završetak rada radne grupe. Direktor UPFBiH najavio je inicijativu za puštanje ovog zakona o hitnu parlamentarnu proceduru.

Prijedlozi UPFBiH odnosili su se uglavnom na sudjelovanje UPFBiH u radu Upravnog odbora Federalnog zavoda za zapošljavanje, bolje sagledavanje potreba tržišta rada, međusobna saradnja nadležnih federalnih i kantonalnih institucija, saradnju sa međunarodnim i nevalidnim organizacija, omogućavanje rada studenata, učenika, sezonskih radnika i dr., a sve u svjetlu trenutnog nedostatka radne snage u FBiH i velikog odlaska radnika iz BiH.

Udruženje je posebno insistiralo te je i u prednacrt zakona uvrštena kontrola evidencije nezaposlenih osoba i sprječavanje zloupotreba po ovom pitanju te stavljanje akcenta na populaciju aktivnih tražilaca posla u odnosu na formalne evidencije nezaposlenih.

## Predstavnici UPKS i direktor UPFBiH održali sastanak sa premijerom Kantona Sarajevo

**Premijer Uk je pružio podršku Udruženju poslodavaca te izrazio želju da se uspostavi kvalitetna saradnja**



Predstavnici Udruženja poslodavaca Kantona Sarajevo i direktor Udruženja poslodavaca u FBiH održali su 18. aprila 2023. godine sastanak s premijerom Kantona Sarajevo Nihadom Ukom.

Na sastanku je razgovarano o deficitu radne snage, ali i o nesrazmjeru lica prijavljenih kao nezaposlenih na evidenciji Zavoda za zapošljavanje i lica koja zaista traže posao - stvarne radne snage.

Premijer Uk je pružio podršku Udruženju poslodavaca, te izrazio želju da se uspostavi kvalitetna saradnja i komunikacija između Vlade Kantona Sarajevo i Udruženja. U tom pravcu, premijer Uk je prihvatio poziv da prisustvuje narednoj tematskoj sjednici Upravnog odbora Udruženja, gdje će se razgovarati o pitanjima od zajedničkog interesa.

## Počele konsultacije o zakonu o dualnom obrazovanju u KS: Poslodavci zainteresirani za izvođenje praktične nastave u kompanijama

**Predsjednik Upravnog odbora Udruženja poslodavaca KS Suad Ećo istakao je kako je donošenje ovog zakona od velikog interesa za poslodavce**



Povodom pripreme Zakona o dualnom obrazovanju u Kantonu Sarajevo, Ministarstvo za odgoj i obrazovanje Kantona Sarajevo upriličilo je 05. aprila 2023. godine konsultacije s predstavnicima privrednog sektora, kao i sa svim ostalim relevantnim institucijama i organizacijama. Zakon je trenutno u fazi izrade prednacrt, a kako ističe resorna ministrica Naida Hota-Muminović, regulisat će pitanje realizacije praktične nastave u srednjim stručnim i tehničkim školama.

"Mi na ovaj način otvaramo komunikaciju s predstavnicima sektora privrede, kako bi, korak po korak, prihvatili naše učenike na praktičnu nastavu, odnosno na rad. Ovaj model dualnog obrazovanja je na liniji savremenih trendova kakvi se dešavaju i u Europi. Jer, vrlo je važno da učenici stručnih i tehničkih škola steknu svoje prvo radno iskustvo i doživljaj na tržištu rada, kako bi stekli što prije kvalifikacije za poslove koje će obavljati u budućnosti u privredi", kazala je ministrica Hota-Muminović.

Pojasnila je kako je planirano postepeno povećavanje broja dana u drugom, trećem i četvrtom razredu pomenutih škola, koje bi učenici provodili radeći u privredi, a gdje bi za svoj rad



primali i određenu simboličnu naknadu.

"Trenutno je prijedlog da učenici drugih razreda provode jedan dan nastave u privredi, učenici trećih razreda dva dana, a učenici četvrtih razreda tri nastavna dana u privredi", istakla je ministrica Hota-Muminović trenutno predloženo rješenje koje bi trebalo urediti izvođenje praktične nastave u ovom zakonu.

Naglasila je da će finalna rješenja ipak biti utvrđena sa svim relevantnim subjektima u ovom procesu, zbog čega su danas organizovane i prve konsultacije na ovu temu, te da nije namjera ubrzavati procese i stvarati dodatni pritisak u obrazovnoj zajednici.

"Veoma nam je značajno da dijaloški, u saradnji sa zainteresiranim stranama i našim partnerima ponudimo najbolja rješenja i uspostavimo okvire ovog zakona, kako bi dobre prakse dualnog obrazovanja zaživjele u Bosni i Hercegovini. Zato smo danas ovdje pozvali predstavnike Instituta za razvoj preduniverzitetskog obrazovanja KS, Privredne komore KS, Udruženja poslodavaca KS, kao i naše partnere iz sindikata. Čast nam je da su nam partneri u ovom procesu i ambasada Njemačke i Švicarske u BiH, te Ured njemačke vladine organizacije GIZ u BiH", dodala je ministrica Hota-Muminović.

Predsjednik Upravnog odbora Udruženja poslodavaca KS Suad Ećo istakao je kako je donošenje ovog zakona od velikog interesa za poslodavce, kao i da oni imaju kapacitete za njegovu implementaciju.

"Na tržištu rada trenutno ima oko 60.000 nezaposlenih, a poslodavci imaju problem kako pronaći kvalitetnu radnu snagu. Mislim da je ovo put kako da dođemo do kvalitetnih, kvalificiranih uposlenika, kao i da još kroz sistem školovanja mi možemo uticati na profilisanje budućih radnika. Ovakvi primjeri su dali dobre rezultate u zemljama okruženja i Europske unije i mi ih samo trebamo primijeniti. Ukoliko ne krenemo u reformu obrazovanja, definitivno ćemo imati usporen proces razvoja Kantona Sarajevo, upravo zbog nedostatka radne snage", istakao je Ećo.

Predsjednik Privredne komore KS Muamer Mahmutović kazao je također da je riječ o reformskom zakonu koji će omogućiti privrednicima da obučavaju i dobiju kvalifikovanu radnu snagu koja im je potrebna i koja će odmah biti spremna za uključivanje u proizvodni proces.

"Ovaj zakon nas približava i zakonima Europske unije, njihovim normama, ali i omogućava lakši dolazak stranih investitora na naše tržište koji upravo ovo žele", naglasio je.

## Sastanak predstavnika UPFBiH i UPRS



Udruženje poslodavaca u Federaciji Bosne i Hercegovine iniciralo je koordinacioni sastanak na nivou stručnih službi te Udruženja poslodavaca u FBiH i Unije poslodavaca RS-a, koji je održan 04. aprila 2023. godine.

Tokom sastanka razmijenjene su informacije vezano za rješenja od zajedničkog interesa, a koje se posebno odnose na probleme propisa na nivou Bosne i Hercegovine, nedostatka radne snage, saradnja s međunarodnim organizacijama, politika vezanih za poslovnu zajednicu, zajedničke projekte i druga vezana pitanja.

Zaključeno je da će udruženja nastaviti međusobnu saradnju i održavati sastanke u Sarajevu i Banjoj Luci s ciljem što operativnijih mjera i aktivnosti iz nadležnosti udruženja.

## Nova članica UPFBi - Livnoputovi d.o.o.



Naziv "LIVNOPUTEVI" LIVNO koristi se od 1.1.1967. godine. Poduzeće je, sa ostalim poduzećima na području BiH, čija je djelatnost bila održavanje i izgradnja putova, bilo u sastavu SOUR-a Putevi BiH sve do 1992. godine. Nakon provedene privatizacije, kupoprodajnim ugovorom Društvo je prešlo u vlasništvo 79 tadašnjih uposlenika Društva.

Rješenjem od 28.06.2000. godine odobren je upis u sudski registar privatizacije poduzeća.

Osnovna djelatnost je gradnja i održavanje cesta.

Predmet poslovanja društva je izgradnja i održavanje puteva, izgradnja autocesta i drugih prometnica, proizvodnja kamenih frakcija, proizvodnja gotove betonske smjese, održavanje i popravak vozila te iznajmljivanje vozila i opreme u građevinarstvu.

Društvo je posebno specijalizirano za izgradnju i održavanje puteva, a posebno, održavanje prohodnosti puteva u zimskom periodu. Društvo ima svu potrebnu opremu i osposobljeno osoblje za proizvodnju i ugradnju asfalta i betona.

Više o kompaniji pročitajte [OVDJE](#).





# UDRUŽENJE POSLODAVACA

---

**UDRUŽENJE POSLODAVACA FBiH**  
**MARŠALA TITA 6, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**